

Пірзаға

Наркамыстың шетіне бұлар күн көкжиекке таяп қалғанда ілікті. Тимур жездесі Мұхмеддиннің «Москвичімен» келген. Алдын ала меже еткен жерге маңдай тірегендерінде бұрын кеткен машинадағылар шөбі таза да биік беткей тауып, жайғасып жатыр екен. Тимурдың сағыныш талдырған жанары әп дегеннен Пірзаданы тапты. Ашық жерге дара шыққан жас талша тіп-тік болып, екі қолын көкірек тұсына айқастырған қалыпта тұр екен.

Ауданның белді қызметкері, басшыларының бірі Бекмырза мен қыздың нағашы ағасы Рысқұл да сол арадан төбе көрсетеді. Машинадан шығуға асықпай сәл отырыңқырап қалған Тимур Пірзаданың киіміне көңіл аударды. Үстіндегісі өткен кештегі жеңсіз жібек көйлек емес, денесімен дене джинси шалбар, күртеше киіп алыпты; өзіне өте жарасып тұр. Аяғындағысы ғана мына жағдайға онша сәйкеспейтін биікөкше сүйретпе сияктанады.

Бекмырза киімін ауыстырмаған – сол бұрынғы сұр түсті бешпет-шалбары, галстук қана салмапты. Әлдебір көңілді хикаямен қыз көңілін аулап тұрған сыңайы бар. Басындағы көгіс селдір қалпағының астынан күлімдеген шаралы үлкен көзі, мол пішімді бетінің шырайлы да үйірімді құбылуы соны аңғартады. Бойы бір тұтам, шәртік қарын Рысқұл болса, тыныш тұра алмай тыпыршып, қара-қошқыл дөңгелек жүзін бастығы мен жиеніне кезек бұрып, құржаң қағып күледі. (Тимур кеше жездесінен бұл қарттың Бекмырзаның қарамағында істейтінін есіткен.)

Басшының қосшыбаласы – «уазиктің» шөпірі – шаруа бабымен ілестіре келген келіншегіне көмектесіп, әлгілерден оқшау бүйірде дастарқан қамдап жатыр. Мұхмеддин «Москвичтен» сөйлей түсті.

– Бәсе, осылай болса керек еді ғой! – деді. Аяқ-қолы серейген, жағы бір құлаш, ұзын бойлы кісінің даусы әлсіз әрі жіңішке болатын, оның үстіне міңгірлей сөйлейтін. Бұдан арғы сөзінде де орынсыз қолпаштау, жарамсақтық танытты: – Өлшеусіз жомарт әрі тапқырсыз-ау, Беке! Бұл қасиетіңіз қай ісіңізден де әрдайым көрініп тұрады. Өзгенің қонағын, бір емес екі үйге келген кісіні, үлкен басыңызды кіші етіп, өзіңіздікіне балап көтерін алып... Дән ризамыз! – Өз есебінше, мұншалықты жарамсақ емес жездесінің, Рысқұл сияқты, Бекмырзадан мүшел жас

үлкен кісінің, мына жолғы мінезі Тимурға ұнаған жоқ. – Қалада тұрғандарымен, бұл жастар да мұндай құрметті күнде көріп жүрмеген шығар... – «Жегенде айтар сөз екен» деген нақылды ұмытып, әлі басталмаған мәжілістің сипатын, шүкір, келістірін жатыр.

– Неғылған ерекше жомарттық дейсіз, тәйірі, әшейін ауыл азаматының міндетін түсінетінімізді көрсеткіміз келгені дағы... Сіз де, көтермелегіңіз келгенде тым биіктетіп жібересіз-ау, Мұха, – деп кішіпейілділік көрсетті басшы.

Әсіресе ауылдық жерде әлі қала алмай келе жатқан, көбіне сол адамдардың жаманшылығынан немесе бақай қулығынан да бола бермейтін, бір жақтың басын жерге ұруы мен екінші жақтың көкірегін көкке көтеруінен өзгеше көрініс. Астамшылықты әлі қанына сіңірмеген басшының бұл мінезі жас жігітке ұнады. Өткен кеш дастарқандас болғалы бері Тимур бұл кісінің табиғаты жайлы әлденеше дүркін ойға қалып, ақыры тиянақты тоқтамға келе алмай қойған. Өзі әлі жиырманы да дұрыс толтырмаған бозбала отыз бестердегі кісіні жас адамға есептемейді, бұл да сөйтті – Бекмырзаны сақа деді. Сөйте тұрғанмен, сынына іліккен бұл адамның бойында жігіт затына лайық қасиеттердің көбінің бар екенін де амалсыз мойындаған болатын. Көрік керек десені, көрік бар, өнер керек десені, одан да құралақан емес; жаңа байқатып тастағанындай, қарашайым, пәс те бола алады.

«Қазақ ішінде кездесе бермейтін әнтек мінезбен жасы өзінен көп кіші қыз баланы да үйіріп, ұйытып тастағаны анау. Және сырт көз бен шет құлақ айып етпейтіндей етіп, өз көңілінің адалдығына елді сендіре отырып, істегенін айт дағы мұны!» деп ойлады жігіт осы арада. Міне, қазір де Бекмырза шашы бұрқыраған, қауғадай басын қыздың жүзіне жакын тұқырта ұстап, бір жағынан, түнжыр да терең, екіншіден, сәл ұрыншақтау жанарын Пірзаға ішінара аударып қойып, кең пейілмен көңілденіп тұр.

Иә, бұл бүкіл болмыс-бітімі ірі де бедерлі, көптен оқшау тұрған жан болатын. Әйткенмен, Тимурдың көкірек көзі әлдебір елеусіз белгілерді байқап, секем алып қалған. Дәл солай екеніне кәміл сенбесе де, «Бұл өзі бірбеткей, ойға алғанын істемей қоймайтын, ол үшін не нәрсеге де баратын қатал адам болмағай еді?» деп, шошынған сол кеше кеште-ақ жас жігіт...

Тимур шешесімен қалада, обылыс орталығында, тұратын. Статистика басқармасында істейді, есептеу машиналарының орта білімді маманы. Көптен шақырып тыным бермей жүрген жездесі Мұхмеддин мен немере апасына қыдырып кеше келген. Жалпылдаған байғұс жездесі, обалы не керек, жаны қалмай қуанып, құшақ жая қарсы алды. Бұл шөлін қандырып, аздап тыныққаннан кейін ерлі-

зайыптылардың арасында әдет бойынша қонақ шақыру жайы сөз болды. Сонда олардың аузына алдымен осы Бекмырза мен Рысқұл ілікті.

Рысқұл бұлармен көптен бері көрші тұрады екен.

— Оларға да қонақ келіп жатыр. Алыстан — астанадан; осы сен қатарлы қыз бала, — деді Тимурдың апасы көршілер жайлы сөз болғанда. — Әлгі мөзика еңстөтінде оқиды білем, тілім де келіңкіремейді өзіне... Демалысқа келіпті. «Екі-үш жеті жатады» деп отырды қыздың аға-жеңгесі. Алдыңғы күні бірге болғанбыз. Қанша жататынында шаруамыз қанша, реті келіп тұрғанда құтылып қалғанымыз жөн де міндетімізден.

— Мүмкін, құдай сәтін салса... әлгі алдағы уақытта біздің Тимурмен... дегенім ғой... — деп келе жатыр еді Мұхияддин, зайыбы:

— Қой ондай айдалаға лаққан жоспарыңды! — деп тыйып тастады ерін. — Өз тумаларыңа әртіс әперіп, көсегесін көгертерсің. Менің тумаларымнан аулақ жүр! Бұл балаға ана кемпірді, шешемді, бағатын кісі керек. Көңілін алаң қылмай, ең құрығанда, сол бағытта сөйлесейші, жазған...

Сөйтіп, бұл Пірзаданы сол кеше кештен бері ғана біледі. Солай бола тұра, екеуі біріне бірі жарытып сөз айтпағандарына да қарамастан, Тимур бойжеткенді көптен танытын сырмінез жан сияқты сезінеді өзін. Сол кеше кештен бергі бірнеше сағатта жас жігіт үшін қыруар уақыт, бұрын бұған қыр-сыры беймәлім шытырман сезімге — сүйініш пен күйінішке, қуаныш пен қайғыға, шаттану мен қасіретке, сенім мен қызғанышқа — толы ғаламат ұзақ мерзім өтті. Сол кеше кеште-ақ мұның сонау бала кезде, ондай мақсатқа арналмаған тасада ұрлап шылым шеге бастаған шамасында, қалыптасқан әйел затына деген астамшылығының, қолдан жасап алған «тісқақтылығы» мен жасанды «еркектігінің» күлі көкке ұшып, быт-шыт болды. Сол кеше кеште-ақ... Асылында, бұл — мынадай алас-қапаста есебін шығарып, ұшығына жетіп болмайтын шыргалаң! Түнімен көз ілген жоқ.

«Жә, бір кеш қана ортақ дастарқаннан дәм татысып, соңынан ұмыт болатын көп қыздың бірі болар» деп еді. Сөйтсе... көршінің қонағы көзін ашқалы мәпелеген күтім көріп, сүтпен ғана қоректеніп келе жатқан ерке ботадай екен. Дөңгелек бітімді аппақ жүзі албыраған, сәл қалыңдау ерні әбден пісіп, жарылып кетуге шақ тұрған шиідей, ай қабақтан төмен түскен етегі жинақы ықшам мұрнының қырына дейін мүлтіксіз еді. Мойылдай қара, толқын ұрған қалың шашы жарқыраған маңдайын әсем көмкерген.

Әйтсе де, бәрінен бұрын оның көзі тамаша болатын. Қазір жарқ етіп, сыртқа сиқырлы сәуле шашса, келесі сәтте оты бәсеңдеп, өз ішіне үніліп кететін мұндай тұңғық жанарды Тимур бұрын ешқашан кездестірген емес.

Жап-жас қыз ол келгенге дейін алқа құрай отырып үлгерген топтан қысылып-қымтырылмастан, жеңгесінің соңын ала еркін аттады табалдырықтан. Және бір көзге түскен нәрсе — оның өн-бойынан сол әп дегенде-ақ еркіндікпен қабат табиғи биязылық, жұмсақтық анық аңғарылып еді. Жанарын отырғандарға кезек аударып, күлімсірей сәлемдесті. Сөйтіп келе жатып, көзі Тимурға түсті де, мол етіп шаш қойған, ат жақты, қара-торы, ықшам денелі жігітті шолып, аз кідірді. Ізінше реңі шұғыл салқындық шақыра құбылып, бұған енді асқақ, өр қарады; көзін тайдырып әкетті. Тимурдың көңіліне алғаш толқу салған да осы қас қағым сәт. Кенет әдетінде жоқ күйге түсіп саскалақтап қалған жігіт, қаланың әдетте еш нәрседен қысылып-қымтырылмайтын еркін бұласы, құрбысымен тіпті бас изесіп те үлгермеді. Әлгіден кейін бойжеткен де бұған көпке дейін бұрылып қараған жоқ.

Пірзада қайда өтерін білмей бөгеліп қалып еді. Әйткенмен ол үшін еш қам жемейтін қалып танытып, өзін қарапайым ұстады. Үй иесі Мұхияддинге көңіл аударды да, жүзі жадырай шырайланып:

— Сәлеметсіз бе?... Шақырған соң келіп қалдық, аға, — деді.

Пірзада сол он сегіз — он тоғыздарда болса керек еді. Бірақ ол өз жасынан ересектеу көрінеді екен. Мүмкін, өзін ұстауына байланысты шығар. Сыпайы, өзгеге ілтипатшыл бола тұра, оның қазақ қыздары көп жағдайда осы кезге дейін қалып етіп келе жатқан үнсіз ұяңдықты, үлкеннің алдында сызылып қалатын ұялшақтықты өзіне міндет деп есептемейтіні байқалған болатын. Керісінше, өзінің келешекте топ жаратынын, өнеріне ел қол соғатынын есте ұстайтыны аңғарылды. «Иә, сөз жоқ, мына қыздың тағдыры мен өмір жолы әдеттен тыс болуға тиіс!» деп ойлады Тимур. Өзінің бұл болжамына қалтқысыз иланды да. Сөйте тұра, көз алдынан айқын елес болып өткен алдағы күндер жас жігітті қуантпады. Керісінше, өз мамандығы көп тірліктің бірі екені қабат есіне түскенде көкірегі сыздап кетті: ол өзін әлдебір кимас асылын тапқан бойда қайта жоғалтқан қапалыдай сезінді.

— Атам қазақ ежелден алдымен қыз баланы сыйлаған, — деді бұл кезде төрде отырған Бекмырза, айнала көз тастап, көтеріңкі дауыспен. — Сондықтан, егер көпшілік қарсы болмаса, Пірзада қарындас төрге озсын. — Бекмырза өзінің дәл осы үйге, осы сағатта қандай оқиғаға байланысты келіп отырғанын тақа ұмытты ма, әлде, ұмытпаса да, ол да қыз көркіне тым елтіп кетіп, ауызға алуға мұршасы болмады ма — әйтеуір бұған дейін де, бұдан кейін де, мәжілістің соңғы сәті келгенше, Тимур жайлы жақ ашқан жоқ.

Басшы азаматтың ұсынысын қуана құп алды ел:

— Болады, болады... Қарсы емеспіз... Өте орынды пікір!..

— Рәқмет, ағалар! — деді Пірзада, шырайланып. Осы арада ғана жалғыз рет — мүмкін, өзінің әдеттен озып үлкен кісілерден жоғары кететіні

үшін бе – ештеп қысылғаны байқалып еді бойжеткеннің. Өз нарқының жүріңкіреп кеткеніне жеңгесі алдында да кешірім өтінгендей кідірістеді де, ізінше еркелене жеңіл басып, іргемен жоғары шыға берді. Бірақ өзіне арналып босатылған қақ төрдегі орынға өтпей, Бекмырзадан сәл төмен, нағашысы екеуінің арасына жайғасты.

– Мекен жайлы болсын, аға! – деді осыдан соң Мұхиддинге. Мәжілістегілерден ернінің ұшымен есендік-саулық сұрады; бұл ілтипаттан, жаңағы айтқан, Тимур ғана мақұрым қалды. Жап-жас қыздың әрі батылдығына, әрі мұншалықты көргенділік, парасаттылығына риза болып, бағалап қалғандары байқалды көпшіліктің. Әсіресе жасы ұлғайғандар кенет дүбірлеп, көңілді лебіз білдіре, қонақтың ел-жұртының есендігін сұрап, қозғалақтап барып басылды. Қайран қарапайым да табиғи еркіндік, сені кез келген жерде жолдас ете қою оңай емес, ал егер жолдас бола қалсаң, берер абыройың көп-ау!...

Кеш бойы өзінің не ішіп, не жегенін білген жоқ Тимур. Әлсін-әлі құрбысына қарағыштап, ас орнына соның ғана түр-түсіне тойып, отырысын, мінезін сіміре берді. Бірер рет өзінің еркек екенін ескеріп, өрекіп ырқына көнбей кеткен көңіліне тежеу салуды ойлап, байсалдылық, ұстамдылық, мүмкін тіпті, тақаппарлық танытқысы келіп еді, бұған әлі келмеді. Сосын-ақ ол әрекеттен тыйылды. «Пірзада бәрі бір байқап отырған жоқ, күш-қуатты зая жіберіп жан қинағаннан не өнеді?!» деді. Әйткенмен, мұның жан дүниесіндегі аласапыранды қыздың сезуі де ғажап емес еді: тағы өткінші көз тастады. Не пайда, сол менсінбеушілік – өзге елді түгел жылы шолған қабақ бұған тірелгенде суынып, сынай, тіксіне қалады. Тимур болса, қуанарын да, қайғыарын да білмей, әрі-сәрі қалыпта қала береді.

Дастарқанда Бекмырзаның жұбайы болған жоқ. «Қара теңіздің жағасында жүйкесін емдетіп жатыр» деп ескертті күйеуі. Мүмкін, сол әйелінің көзі жоқтықтан да шығар, Бекмырза Пірзаданы әп дегеннен жаңағыдай еркін қатынасқа шақырып, аса жайдары отырды. Мәжіліске де бағыт беріп, жұртты көңілді әңгімеге, әзіл-қалжыңы жарасымды іргелі басқосуға жұмылдырғысы келетінін байқатты. Ел мерейін ойлайтын азаматтың шеттен келген қонақ сынап кетпесе екен деп, сол үшін күш салатын жақсы қамы еді бұл.

Бір кезек мәжілісті басқа арнаға бұрып, соңынан Пірзаданы бөлектенкіреп, оған қарай бүкіл денесімен бұрыла ыңғайланып қырай отырып, ауданның, ондағы шаруашылықтардың жай-күйін, қол жеткен табыстары мен әлі түзелмеген кемшіліктерін қысқаша әңгімелеп берді. Басшының мұнысын да Тимур құп алған-ды. «Шын азаматтың қылығы, еңселі мінезі ғой мынау» деген.

Осыдан кейін-ақ Бекмырза сыршыл да ойлы қалыпқа түсе берді, ақыры іргеге қол созып, қолына домбыра алды; ән қайырды. Домбыраның екі шегін ілмелей кезек қағып, онысы сикырлы үйлесім, құбылған күмбір шығарып, баппен шалады екен. Даусы да әдемі қалықтады. Жиырма бесті жоқтады, оның ұзап кеткеніне жаны жылай өкінетінін толғады:

– Ауылымның қонған жері жусан ба екен,
Белімді тал жібекпен бусам ба екен?..
Жиырма бес, бір қайрылмай қара үздің, –
Соңынан қос ат мініп қусам ба екен?!

Қызмет бабымен қаладан қырға шыға жүргелі қарапайым көпшілік пен басшының әдемі үйлесіміне, келісті ынтымағына алғаш рет куә болғаны еді Тимурдың. Жігіт енді байқаса, Бекмырзаның табиғатына Пірзада да ден қоя елтіп, тіпті мүмкін, көңілін аздаған жеңілтектік баурап, ақша беті құбылып отыр екен. Осы сәт Тимур өмірінде алғаш рет құрып кеткір гитарды ұзынсонар дыңғырлатуды үйренгенше, бабаларының мұңдасы – домбыраны үйреніп, соның жетемелдеуімен қабілетінің жеткенінше әп айтып машықтанбағанына мықтап өкінді. «Әншейін тасада қалып қойсаң да ештеңе емес, ал, мынадай іргелі отырыстарда жиі болатынындай, домбыра қолдан қолға көшіп, кезек маған да тиіп қалса қайттым?!» деп шошынды. Абырой болғанда, домбыра «еріншектік танытып», Бекмырзаның тізесіне көлденең түсіп, жатып алды да, жігіттің жүрегі орнына келе бастады. Жаңағы сәтте алаулап кеткен жүзі салқындалған соң байқаса, тыным алған әнші мен қонақ бойжеткен енді сыпайы қошемет әңгімесін айтысып отыр екен.

– Аға, Арканың әншілерінше сырбаз шырқап, домбыраны да бабымен тартады екенсіз, – деді қыз. – Енді, мүмкін, бұған қоса қазақтың тағы бір атақты өңірі – Қаратаудың күйлерін білетін шығарсыз?

– Ондай жан-жақты ірі өнер бізде қайдан болсын, қарағым қарындасым, – деп күле жауап берді Бекмырза. – Әншейін сұлбасы ғой келтіріп жатқанымыз. Өзің сияқты қонақтың көңілін аулау үшін аянбағанымыз шығар. Бізге қонақ-қопсы, шынын айтқанда, таңсық емес: олар күнде келеді. Өзің сияқты қонақтың жөні басқа, қарағым... Сосын, сендердің қастарында біз не білеміз, тәйірі, әйтеуір көңіліміз орнықты, оған да шүкір. Өнер сендерде ғой...

– Өкінішке орай, өз басым домбыраны жөнді тарта алмаймын, – деді Пірзада. (Неге екенін өзі де пайымдамастан, Тимур бұл сөзге кәдімгідей қуанып қалды.)

Әңгіме сәл іркіліс тапқан осы мезетте қыздың нағашы ағасы Рысқұл шыдамсыздық көрсетті. Манадан, мәжіліс басталғалы бері, жиенінің лауазым, парасаты елден озық азаматпен — ауданның басшыларының бірімен иықты тең ұстап, қысылмай-қымтырылмай мәслихаттасқанына көрнеу масайрап отырған. Пірзаданың әлгі сөзінен кейін кенет қызарақтап, әлденеге кінәлі болып қалған кісіше айналасына жалтақтай қарап, реніш айтты:

— Домбыра білмегенде не үйреніп жүрсін, қарағым-ау?! Баламысың деген!.. — деді.

— Тірліктің өзге тораптарындай, музыкада да әр қилы мамандық бар ғой, нағашы, — деді Пірзада, сол байсалды да еркін қалпын бұзбастан. — Менің таңдап алған аспабым — күйсандық. Көзімізді сонымен аштық қой. Оған қоса, қабілетімнің жеткенінше, ән, күй мектептерін зерттесем деймін. Мұның екеуі де — қазақ қыздарының қолына әлі көп түспей жүрген мамандық...

Рысқұл бұл жауапқа тұшынбады.

— Өйткенше, қарағым-ау, мына Бекен сияқты ән, домбыра үйренбедің бе! — деп, тағы айналасындағылардан қолдау тілей жалтақтап, отырған жерінде домалана қозғалып қойды. — Осы үйдегілердің ішінде домбыра ұстап, шалмайтыны жоқ...

— Нағашы, дұрыс айтасыз. Әйтсе де мен тіпті сізге дейін жеріне жете меңгеріп қойған өнерден қашкалақтап, шамалысы болса да, тыңын қаладым, — деп күліп, әзіл айтты Пірзада.

Дәл бұл жолғыдай ел сирек көңілденетін болса керек. Терезе сынып кетер ме екен деп еді Тимур!

— Мыналардың ішек-сілелері неге сонша қатады? — деп сұрады ол өзінен бір мысқал төмен, етекте отырған Мұхмеддиннен.

— Ой, ол... бар болғырды қой!... — деп, Мұхмеддин екі қолын қатар сілтеледі. — Жаным-ау... тугалы «әу» деп көрмеген бәле ғой. Құлағын бала кезінде бұзау басып кеткен... Домбыраны қалай ұстайтынды білмейді, керек десең, шанағын жоғары қаратып шоқпарша ұстайды. Кішкене кезінде әкесі «Өлең айтып менің атағымды шығар» деп сабаған екен, содан бері мын су жайлап кетулі.

— Айтпақшы, сіз әлгі «Құрдасым еді...» деп айта беретін, жылап отырып: «Мұхиттың екі ғана сиыры бар-ау, соған да шөп тауып бере алмай жүр-ау», — дейтін «мықты» осы кісі ме еді?

— Иә, өзімен кетсін, ых-ых...

— Жә, мамандығың болмаса мейлі... бәрі бір сол ән-күйдің саласы ғой... Бізге білгенінше бірдеңе айтып бер, — деп қолқалап, ел ақыры Пірзадаға ән айтқызды.

Оның айтқан әні мен үні, орындау машығы елдің көкейіне онша қона қоймаған сияқты еді. Тимур көзімен отырғандарды адақтап шықса, әнге Бекмырза ғана елтіп, көзін жұма ұйып қалған екен. «Мына кісі, шынында да, музыканы ұту, түсіну саласында аса қабілетті жан болды-ау, шамасы? Дауыстың әнебір күшті, бояулы емесіне қарамай, оның тазалығына ден қойып отырғаны шығар» деп ойлады Тимур. Пірзаданың үнінен өзі де әлдебір қасиеттер аңғаруға тырысып еді, онысынан ештеңе өнбеді. Бекмырзаның әлгідей күй кешкені рас екен — ол көзін ашқанда жанарының өзгеріп қалғанын байқады Тимур. Ізінше Пірзадаға бұрылып, байыптап қарағанында көзінің оты жалт етті. Сол қас қағымда жас жігіттің көкірегін қызғаныштың темір шенгелі қайта құрсаулап, атой сала жөнелген жүрегі ырық бермей, әлдебір ойға берілді.

Қонақтар үйді-үйіне тарап сейіле келгенде Бекмырза ғана орнынан қателіміде көтеріле қоймай, отырып қалды. Сосын Мұхмеддин мен Рысқұлға шаруа айтты:

— Аудан орталығы деп дырдай қылғанымызбен, шынында, бұл да ауыл. Пірзада қарындас пен мына інішек ауылымызға қыдырып келе қалған екен. Түрлері, бес-он күн болатын сияқты, өйтіп жатса тағы көрерміз. Әйткенмен, соған сеніп қалғаның, бәріміздің бірдей тарап-тарап жүре бергеніміз үйлеспес... Сосын, бұларды, қашықтан қарт кісілер келгенде істейтінімізді істеп, ылғи үйде ұстап ас-су бере беруміздің реті және жоқ. Сондықтан, егер қарсы болмасаңыздар, ертең кеш, қызметтен кейін, таза ауаға шығайық деп ұсыныс жасағалы отырмын. Шағын ғана топ бас қосамыз. Әңгіме айтармыз, құс атармыз. Елшімді таңқалдырары болмағанмен, біздің жердің де табиғатын көріп кеткендері жөн шығар жастардың...

Бұл ұсынысқа сол жерде-ақ қол қойылып, аттанар мезгіл мен ат басы тірелер меже белгіленіп тасталған-ды. Тимур сыр бермеді, ал Пірзада болса балаша ашық қуанды. Бойжеткеннің мұнысын қызықтай күлімсіреп аз кідірген Бекмырза:

— Мылтық ата білетін бе едің, Пірзада қарындас? — деп сұрады. Әңгімеге кеш бойы алдынан ішімдік қайтармаған, сондықтан елден ерекше көңілді қалыпта отырған Рысқұл араласты:

— Ойбай, біздің жиен қатырады! — деді.

— Нені қатырады?

— Тіл тартқызбай жібереді, оллаһи-білләһи!

— Ай, нағашы-ай, орнынан тапжылмайтын нысанаға екінің бірі тигізеді. Мерген деп қашып бара жатқан құсты топшысынан байлайтындарды ғана атаса лайық-ты, — деді жиені.

Оның нағашысына бұрған жұмсақ та жылы жанарынан қартты әрі аяп, әрі жақсы көретінін аңғару қиын емес болатын.

— Сонымен, мылтық ұстағаныңыз рас болды ғой, Пірзада қарындас?

— Көп мергендігім жоқ, тек әшейін мектепте еркімнен тыс жарысқа қатыстырғанда алған аздаған машығым ғана бар, — деді Пірзада. Осыдан соң әсіресе Тимур еш күтпеген, бірақ, сөз жоқ, бұған қатысы бар әзіл айтып еді: — Әйткенмен, егер қолыма кіші калибрлі винтовка берсеңіз, аузына су толтырып алғаннан бетер дыбысы шықпайтын бозбалалардың тіккен бөркін тесіп беруіме болады, — деді.

Ақыры түгел көтеріліп, кеткелі жатқан қонақтардың соңы бұған тағы да күлкімен жауап берді. Бір ғажабы, бұл жолы да Пірзада адам түсініп болмайтын мінез танытты — жаңағы әзілінен кейін, ізінше, қабағы суынып, бұрынғыша паң, асқақ кейіппен жігіттен сырт айналып кетті.

* * *

— Әуелі аздап әл жиып алайық, — деді Бекмырза, топқа Мұхияддин мен Тимур қосылып, келетіндер түгенделген соң. — Содан кейін, оны-мұны піскенше, қалыңға кіріп, бағымызды сынармыз.

Бекмырзаның жігіті әлі тыным көрмей жүр. Мәшинаның ішінен бірнеше төсеніш көрпе шықты. Кенеп жаппаның ортасына жайылған дастарқан үсті болса, құлпырып қалыпты: әртүрлі тағам, бөтелке түрлері көзге түседі. Шөпір жігіттің келіншегі ошақ айналдырып, қазанға ет салып жатыр.

Бұлар ас ішуге дендеп кірісіп, мәжіліс енді-енді қыза бастаған кезде қосшыбаласы Бекмырзаның жанына екі мылтық, оқшантай әкеліп қойды. Тимур мойнын созыңқырап, мылтықтарға көз салып еді, бірі кіші калибрлі винтовка екен де, екіншісі... қаракөк темірі қырауланған суық, оңтайлылығы ойыншық дерлік қосауыз екен. Мұндай мылтықты бұл бұрын кездестірмеген болатын: құндағы, бауыр ағашы оймышты, мойны мен шаппа-шүріппесі әшекейлі қымбат дүние еді. Иесі мылтығын қолына алып, сүйсіне қарап, жанды нәрсе сияқты құндағынан «еркелете» қағып-қағып қойып, қашығырақ тастады.

Сол кезде ғана мылтықтың қос ұңғысының астынан үшіншісін байқады Тимур. Қонаққа тиежақ еркіндікті пайдаланып, алдына алып тамашалағысы келіп бір ойлады да, сосын ол ойынан айныды — «Жә, ештеңе көрмеген адамша үнірендемей-ақ қояйын» деп, мылтыққа ақыры қол созбады.

— Бұл қосауызды бүгін Пірзада қарындас ұстаса лайық-ты, — деп, оргаларындағы бойжеткенге тағы ілтипат білдірді мүлік иесі.

Тимур іштей өзіне өзі күліп отыр. «Ай атқышбегім-ай, ел сияқты сен де неге ана мылтығыңды әкеліп, мына жерге «жарқыратып» тастамайсың?» деп қояды. Күлсе күлгендей: мұның алып шыққаны

жездесінің көп заманнан пайдаланылмай, қараңғы бұрышты иемденіп тұрған шірік дарауызы болатын. «Кезінде теңдесі жоқ мылтық еді!» деп Мұхияддин мақтай берсін, Тимур күні бойы айналдырып, әрең іске асырды. Абырой болғанда, әзірге жұрт көзінен таса жерде — машина ішінде жатыр.

— Қарындасыңызға артық-кемі жоқ тура бір пұт жүк арқалатқыңыз келгенін қалай түсінуге болар екен, аға? — деп әзіл айтты Пірзада. Кіршіксіз тісі сәл көгіс реңмен жарқ етіп, тағы тізіле қалды. — Мылтық көтеріп, беліме оқшантай байлап... Жоқ, аға, рахмет!..

— Сөзден бұл жолы да ұтылдым, қарындасым, айып менен, — деп күлді Бекмырза. — Сөйте тұрғанмен, қару ұстамайсың ба сонда?

— Анау кішісін пайдаланармын. Бірақ оны да өзім алып жүре алмаймын.

— Түсінікті-түсінікті, айтқаның түгел орындалады, Пірзада қарындас! Тимурдың топшылауынша, Бекмырза бойжеткенге кешегіден де гөрі елтіңкіреп отырған сияқты еді. Ал Пірзаданың қосауызды пайдаланудан бас тартқанын көргенділігінен деп ұқты.

Пірзада кенет томсарып, көңілісіденіп кетті. Үлкен шаралы жанары, оты бәсеңдеп, өз ішіне үнілді. Енді, міне, бұлар отырған жерден төмен жатқан, ертерек кездегі үлкен көлдің орны — нарқамысты шола қарап отыр. Күрсінің қойды.

— Бұл жерде құс көп бола ма? — деп сұрады, сауалын ешкімге арнамастан.

— Қайдан көп болсын. Жалпы аң мен құс атаулы, соның ішінде қаз-үйрек деген жарықтық та, жыл өткен сайын азайып бара жатыр ғой, Пірзадажан, — деп жауап берді жиеніне Рысқұл, бұл жолы салықалы қалып танытып.

— Мен әбден болдым, ағалар, — деді Пірзада, орнынан көтерілігісі келетінін білдіріп. — Енді, сіздерден рұқсат болса, қыр бетті байқап қайтқым келіп тұр. Көп кідірмеймін.

— Рұқсат болатын шығар? — деп, Рысқұлға бұрылды Бекмырза.

— Барсын, — деді Рысқұл. Сосын: — Бірақ жалғыз жүрме, айталық, ана Темірді ілестіре кет, — деп қосып қойған. Тимур бұл сөзге қуаныш та үлгермеді, бойжеткен:

— Жоқ, жалғыз барам, — деді. — Жарты сағат — қырық минуттан артық кідірмеспін, маған алаңдамандыздар.

Уәделі мерзім өткеннен кейін Тимур үлкендердің ыңғайлауымен Пірзаданы іздеп барса, қыз аяқкиімін шешіп қолына алып, ойпаңдау жерде отыр екен. Бұған, «Е-е, сен бе едің, келетініңді білгенмін» деген кісіше, қырыңданқырап қарады. Сөйте тұрғанмен, үні бейбіт естілді.

– Кірпікшешен көрдім, – деді. – Бауырының жазылуын күтіп айналыңқырап қалдым.

– Кірпі ме еді... – деді Тимур.

– Сіздің оны менсінбей, бүйтіп ерін шүйіруіңіз дұрыс емес, – деді бойжеткен, жігіттің сөзіне наразы болып. – Біз, қазақ баласы, «кірпікшешен» деп онша ұнатпаймыз, ал, шынында, ол өте сүйкімді мақұлық...

Мейлі сараң, аз сөз бола берсін, өзгенің ортақтығы жоқ, тек бұған ғана арналған осы екі-үш сөйлем жігіт үшін «күйдім, сүйдім» дегеннен кем әсер еткен жоқ. Сұлу бикешпен сырлас болып үлгерген адамша, пәк те мөлдір қуанышты сезді жүрегi.

– Сіз, егер музыканы қаламағаныңызда, кім болар едіңіз? – деп сұрады жігіт, батылданып.

– Биолог болар ем. – Сосын сәл ойланыңқырап тұрды да: – Иә, сөз жоқ, биолог болар ем! – деп қосып қойды. Шұғыл жадырап күлді. – Сіз жусанның неше түрі барын білесіз бе? – деп сұрады.

Тимур абдырап, не дерге білмей қалды. Жусанның неше түрі болатынынан оның еш хабары жоқ еді. «Қап, ең құрығанда, осыны неге біліп кетпеймін?!» деп қынжылды.

– Тек осы өңірде ғана жусанның он алты түрі өседі. Ұмытпаңыз, бір құрбыларыңызды таңырқатарсыз, – деді Пірзада.

Сыр бермегенмен, Тимур бұл сөзге кәдімгідей жәбірленіп қалды...

* * *

– Сіз қасыңызға мына інішекті алып, қамысқа осы арадан тура түсініз, – деді Бекмырза Рысқұлға, жастар топқа қосылғаннан кейін, Тимурды нұсқап. Басшы бұрынғы киімін тастап, үстіне кенеп шалбар мен күртеше, аяғына шаптан келетін резин етік киіп алынды; дудар шашын ғана ештеңемен бастырмаған. – Қамыстың орта тұсында, осы арадан шақырым жарымның шамасында, арал бар. Сол аралдың бергі жағындағы айдыңа маңдай тіреп, тосқауылда тұрып атасыздар... Енді сіз, Мұха, оң жақтан айналып барып, жаңағы көлшіктен шығатын жылғаны міндетіңізге алыңыз. Ал біз, Пірзада қарындас екеуміз, сол жақтан орағытып, көлшікке құятын жылғаны қуалай, ортаға қарай жылжымыз. Қамыстың біз баратын беті қатқыл, ол жерде жайдақ су аз. Пірзада қарындас мына аяккімімен тек сол жақ арқылы ғана өте алады... Осылай етсек, су іздеген құс біткен қарауылға ілігеді де, бесеуміздің біріміз оны алып қаламыз. Енді, шамамен, сол бір сағаттың төңірегінде құстың кешкі жүрісі басталуға тиіс. Ал сәтін тілейік!...

Рысқұл әдене деп мінгірледі. Өзге елдің алдында ыңғайсызданғаны, жиенінің мұның қасына ілеспей, Бекмырзамен бірге кететіні үшін ұялғаны болар. Бірақ карттың сөзі жүйесін таппай айдалаға лағып, болбыр шықты:

– Дұрыс қой... Бұл маңда басқа су жоқ, сондықтан бөліну керек өзі-ақ та... Сондықтан енді, әрине.. Әйтпесе қалай... – деді.

«Дұрыс емес! Солай десейші, орынсыз жерде де жалбақтап жаман үйренген сорлы-ау!» деп тұр Тимур іштей. Көкірегінде тағы кешеден бері үйреншікті зәрі удай ащы қызғаныш тұтанып, сол пайда болған сәтінде алдымен мұның жүйкесін шарпып, күйдіріп бара жатты. «Тегіс жерде асқар тауымын дейтін төбешіктер өңшен!.. Өзгенің көңілін, ұятын ескерсе қайтеді, әдет-ғұрыпты белінен көлденең басқанша?!» деп тұр іштей, басшыны іске алғысыз етіп...

Енді, міне, қалың қамыстың ішінде келеді. Көкірегін жайлап алған манағы қызғаныш одан сайын белең алып, ақыл-есін матап, сұмдық күдікке, қорқынышты болжамға жетелейді. Кеше ғана желсіз күнгі тоған суындай тыныш та қаперсіз көңілі соңғы аз сағаттың ішінде күтпеген сыңға, дүмпуге ұшырады. Енді, міне, тіпті астан-кестен.

Жанында Рысқұл, екеуі қамыс ішіндегі суды шатқа дейін жететін резин етікпен күш сала кешіп, жаймен жылжып келеді. Қалың ну іші қапырық, шіріген шөптің мұңкіген иісі. Бұған қоса шыбын-шіркей, маса берекені алып, шаққаны да ештеңе емес-ау, көзге, құлаққа кіріп, шыдамды азайтып барады. Тимур тасырлық көрсеткенмен, Рысқұл қынар емес. Оның мазасыздануы, елеңдеуі құсқа ғана байланысты. Өзі бір жері терең, екінші жері тайыз сумен, көзден таса кедергілермен әрең келе жатып, әдіс-айла жасауға тырысады, жігітке «Бұқ, ойбай, бұқ!» деп қояды. Әлгідей жағдайда бұққанында не береке болсын – иығын ғана қушытып, екі көзін жұмғанына мәз. Бітімі шар сияқты, кеудесі де көнектей бәленің иығы да құнысып жарымайды. Ізінше, бір сәт қозғалыссыз қалғаннан кейін, көкке алара, күтіне қарайды да, онсыз да жоғары ұстап келе жатқан мылтығын одан сайын шошаңдатып қояды. Обалы болса қайтсін, «Апырай, құс ататын кісіге еш жері ұқсамайды ғой мына шіркіннің!» деп қояды Тимур. Әйтсе де, сапарласының мінезі мен қылығы біртіндеп жігіттің жанын жадыратып, көңіліндегі қасіретін жеңілдетті. «Қойшы, жоққа жори беріп қайтем: болашағын ойласа, кез келген құшаққа қыз да құлай кетпес, азамат екені рас болса, ондай сорақылықты ана кісі де ойға алмас...» деп, көңіліне шыдам, медет шақырды. Мана Пірзада басшымен бірге бұлардан ұзай бергеннен бері иттей ұлып келе жатқан жан дүниесі осыдан кейін ғана там-тұм тынши

бастады. Енді бұл да көкке көбірек көңіл бөліп, қалың қамыстың ұлпа басының арасынан кенет үйрек шыға келмес пе екен деп, елендеп қояды. Көк жүзі құр емес еді, әйткенмен ешкімге қажеті жоқ қарға мен сауысканнан өзге құс тым жоғары өтіп жатқан болатын. Шыған-тоғайда көк жүзін жарып кикулап, сол үнімен аспанның астын әсем де мұңды сыңғырға толтырып, қаз тізбегі өтеді. Өре жетпестей биікті таңдап, алысқа сапар шеккен көк серілері!...

Өзгелерден сәл төмен ұшқан осындай қаз тізбегінің біріне Пірзада дара оқ шығарды. «Пірзада!...» деп, тұншығып қалды жігіт. Қиян қашықтыққа қарамастан, атқан оғын шамаластырып еді асыл зат. Орта деңгейде кетіп бара жатқан қаз жалт беріп, тізбекті бұза жазлады да, қатар қайта түзелді. Пірзада оғының қазға тимегені Тимурдың көңіліне еш өкініш әкелген жоқ. Керісінше, оның осынау биікті таңдап, әлденеше мылтықтың ішінде алғашқы болып оқ шығарғаны мерейін өсірді мұның. Пірзада да мәрттік жасады – қайталап атпады.

Тимур, бұрын тиіп-қашып қана мылтық ұстағаны болмаса, бұл салада да тәжірибесіз еді. Енді байқаса, құсқа байланысты желіктен бұл да құралақан емес екен. Мұнысына шын таңқалып келеді. Пірзаданың «хабары» делебесін қоздырып, қаруын ыңғайлап алды. Келесі оқты өзі ғана шығаруға тиіс сияктанып, әлденеше дүркін дарауызын көкке кезеген, – Рысқұл тосқауыл бола берді.

– Атна, ойбай, атпа: тым алыс! Тигізе алмайтының өз алдына, содан соң көпке дейін үстімізге құс жоламайды, – деп безек қакты.

Кенет сол қапталдан, мана Пірзада оқ шығарған тұстан, арасын жидірмелете екі дүркін дүмпу естілді. Қара мылтықтың дыбысы кешкі тымық ауада оң қапталға қарай асып кетіп, кері жаңғырықты. Ізінше қамыс басының оқта-тектегі сыбдырынан өзге қапысы жоқ тыныштық қайта орнады.

– Алдыңғысы тиді, ал соңғы оқ зая кетті, – деді Рысқұл, енді әудем жер кейін келе жатқанымен, күбірі ап-анық естіліп. – Бекенді қойсайшы, мерген ғой. Біз о кісінің қасында...

«Қайдан біледі?!» – деп ойлады Тимур. – Әлде үйреніп кеткен әдетпен әншейін қолпаштап келе жатыр ма екен?» Тағы түнеріп кетті. «Егер ол шектен тыс мерген болып шығып, сенің жиеніңді «атып» алса қайтесің?» деп дауыстай жаздап, шақ қалды. Ізінше өзін адам айтқысыз жек көрді, әлгі ойы үшін. «Жоқ олай болуы мүмкін емес!» деп тағы әлденеше қайталады.

Тимурдың ойын Рысқұлдың баж еткен үні бөліп жіберді:

– Ат, ойбай, ат!...

Жігіт көкті апыл-ғұпыл шолып, ештеңе көре алмады. Сасқалақтаған күйі аға жолдасына көз салып еді, қарт оқыс қозғалғандықтан шығар, тиянағын жоғалтып, шалқалап бара жатыр екен. Сол алас-қапаста мылтығын да кезенген болып барады. Әбден суды шашырата құлар сәтінде тарс еткізді.

Ізінше манадан бері тыныштық сақтап, дыбыстаса да тұншыға дыбыстап келе жатқан шал тамағының тығыны кенет ашылып кеткеннен бетер, айқайды салды-ай келіп:

– Тиді, тиді, Теміржан, тиді!... О, Жаратқан жапшарие-е-м, елегеніңе мың да бір шүкір!... Тауып бере гөр, айналайын Теміржан, жаман ағанның қанды қарауышына іліккен құсты! – Өзі де үйрек құлаған тасаға қарай, суды шалпылдатып, ұрып барады. – Білсін, бәлем, білсін бәрі де менің кім екенімді! – деп, әлдекімдерге айбат та шегеді.

Тимур үйректі тауып алды. Өзі атып түсіргеннен бетер көңілді. Рысқұл мақтанса мақтанғандай екен: қаптай ұшқан көп үйректен екінің бірі үлес алады, ал өзі төмен ұшып, әрі зымырап келе жатқан дара шүрегейдің жөні бөлек енді, айналып кетейін. Жарады, мерген-ақ екен ағасы!

Шүрегей өліп қалыпты. Қалжасы әншейінде де бір уыс байғұс лекер кеудесін әлденеше пытыра тесіп қанға бөккен қалпында тіпті аянышты еді.

– Мерген екенсіз, Іреке, құттықтаймын! – деді жігіт сонда да.

– Тәйт әрі, «құттықтаймыны» несі-ай! Орыссың ба? Одан да «Аға, атып алған құсыңды алып жүрейін» демеймісің? – деп, қоқиланып қойды қарт.

– Ағасы атып түсіруге жалықпаса, інісі алып жүруге жалықпас, – деді жасы ұлғайған жолдасының балаға лайық мақтанын кең пейілмен кешірген жігіт. Сөйтсе, мұнысы көрнеу қате болыпты: келесі сәтте Рысекең іліп алды да кетті дейсің! Обалы не керек, қай жылы қай жерде неше құс алғанын, таптырмай кеткеніне дейін түгендеп, түп-түгел біледі екен. Осы сәтке шейін өзі қырағы бақылап, қорғаштап келе жатқан тыныштықты да мақұрым етті. Майлы дөп-дөңгелек жүзі қызара бөртіп, кішкене көзі қуаныш жасына шыланып жалтырап, түкірігін шаша шашпаң сөйлеп, желдей есіп келеді. Қасындағы жігіт:

– Іреке, шөлдеген жоқсыз ба? – дегенде ғана өзінің шектен шығыңқырап кеткенін түсінсе керек, жөткіріне ыңғайсызданып, үнсіз қалды. Әйткенмен, әлгі сұрақты Тимур жасы өзінен көп үлкен кісінің аузына қақпақ болу үшін бермеген болатын: жігіт, шынында да, өте шөліккеп кетіп еді. – Тіпті леп жоқ, қайнап тұрады екен ғой қамыстың арасы деген, – деп ақталды. – Мана, жолға шығарда, қоржыныңызға құты салып жатқан сияқты едіңіз?..

– Ә, бар-бар, – деп, мойнына іліп алған кенеп дорбасының бауын босатып, ішінен аузы бұрандалы ыдыс алып пықты Рысқұл. – Ма, сіміріп жібер. Жаныңды рақатқа бөлейді ғой бұ қымыз жарықтық.

– Әуелі сіз ішіңіз.

– Алаңдама, іше бер. Мен әлі шөлдей қойған жоқпын. Қапелімде шөлдемейтін қасиетім бар.

– Олай да бола ма?

– Болады... Адам, өзі де байқамай, әдетте асты да, сусынды да көп ішеді екен, менің соған көзім жетті. Осыдан үш-төрт жыл бұрын, шілденің қақ ортасында, тамағымды салқын алып, сол басылмай асқынып баспа болып, ақыры құтыла алмаған соң жұтқыншақ безімді сылыттым. Жылдың жылы маусымында істелмейтін әпірасия екен, жүрегім соқпай қалып шатақ шығара берген соң, маған соны, күннің ыстықтығына қарамай, істеді. Қан да көп кетті; соңынан сусынсыз үш күн жаттым. Ал содан бері, көрген азабымның есесіне, күнге қақтап қой мейлің, қыңбаймын.

Қарттың мына қасиеті Тимурға ұнап еді. Жігіт енді аға жолдасын кәдімгідей сыйлап қалды.

Күн екіндіге таянып, әуе қоңырая бастады. Қараңғылық үйіріліп келе жатты. Манағыдан кейін тағы да сол қанаттан, бұл жолы жақын маңнан, бір дүркін гүрсіл естілді де, сосын сап басылды. Көп оқ шығарған Мұхиддин ғана. Ол, мылтығының үніне қарағанда, тым алыста жүрген болатын. Айдыңның үстіне келуге тиіс қанша құсты бағытынан адастырып, басқа жаққа жібергенін кім білсін, әйтеуір тарсыл-тұрсылға кенде емес, «той» соның маңында. Бұл кезде Тимур мен Рысқұл нарқамыстың ортасындағы айдын мен аралға ілігіп еді.

Айдын аядай ғана екен: ұзыны сол елу қадам шамасы, ені одан екі есеге жуық аз. Екі жағы жылғаланып жатыр. Айдыңның арғы бетіндегі арал жоталанып, кешкі көлеңкенің әсерінен шығар, көзге қарақошқылданып көрінеді.

– Сен көлшіктің жоғарғы жағына, Бекмырзалар жақтан келетін жылғаның тамағына, барып тұр. Мен төменіректе бой тасалайын. Арамызды жиырма бес – отыз адым ұстайық, – деді Рысқұл өндірі жолдасына. – Сосын және бір нәрсені есінде берік ұстағайсың: жоғары жақтан келген құсты үстіне жеткізбей атушы болма. Үстіңнен асыра беріп ат. Сөйтсең, құс жалтармайды, сен тигізе алмасаң, менің алып қалуым мүмкін. Төменнен келген құсқа мен де осы әдісті пайдаланармын... Жарай ма?

– Жарайды, – деп бас изеді жігіт, аң, құс алудың қыры мен сырының өте көп екеніне бір күннің ішінде әлде нешінші рет куә болып.

* * *

Тимур қамыстың қалың өскен жерін паналап, тосқауылда жарты сағаттың үстінде тұрды. Бұл уақыттың ішінде жоғарыдан да, төменнен де атуға ыңғайлы құс келген жоқ. Соған қарамастан, Рысқұл тағы бір үйрек алды. Тимур да, әріптесі айтқан ақылды берік тұтынып, біреу оқ шығарып еді, ол еңбегі зая кетті. Сондықтан, аспанның астын құр бекер жаңғырықтыра беруге зауқы соқпай, көкті керенау ғана шолып, мылтық суытты.

Жігіт кенет сырт көзге еш себепсіз өзінен-өзі селк етіп, тұрған орнынан жылжып кетті. Оның ойын тағы да сұмдық қорқынышты жорамал баурап алып еді: соңғы қырық – елу минут бойына Пірзада мен Бекмырза жүрген тараптан бір де бір мылтық үні естілмей кеткен болатын.

Осы жай санасына шұғыл жеткен жігіттің жүрегі атша тулап, тұла бойы от болып жанды. Бұл сезім манағыдан гөрі азаптырақ еді. Енді келесі сәтте дарауызын кеудесіне қыса түсіп, қалың қамыстың үкілі басынан асыра көз салуға тырысып, аспанның Пірзада жүрген жақ бөлігіне бақырая қарап қатып қалған жігіттің көкірегінің мұз жайлап, қақатып бара жатты.

– Қайдан ғана ұшырасып ең?! – деді күңгір үнмен, өзін жер жүзіндегі ең бақытсыз пендеге балап. Сөйтті де, жіңішке болғанымен, әлді саусақтары дір-дір ете, беліндегі окбелбеуді сыйпалады.

Сол-ақ екен, оқты боратты-ай келіп! Қашықтығына байланысты өзін өзі тежемеген кісіге, әсіресе кешкісін, көкте үйрек көп қой. Құстың қарасы көрінді болды шүріпше басты.

Бір мезет тыным алып, төңірегіне құлақ түріп еді, тағы да селт еткен дыбыс естілмеді. Енді шегірткенің шырылы да жоқ еді. Тіпті қол созым жердегі Рысқұл да жер жұтып қойғаннан бетер тым-тырыс. Әлде мұның құпия сырын, жан азабын барлап, сұңғылалықпен ұғып қойды ма екен шал? Мүмкін, сондықтан да «Әй, бәтшағар, қойсайшы, бәрін зая жібердің ғой қыруар еңбектің!» демей тұрған шығар.

Қара-қошқыл мұнарға орана бастаған зымыран көкте, аспанның күңгей бөлігінде, қиыс өтіп бара жатқан топ үйрек кенет Мұхиддиннің қарауылына ілікті. Дегенмен, қатарлары шығынға ұшырамады, бағыттарын өзгертіп, көлшікке қарай бет алды. Асығыс, үркіп ұшқандықтан биіктікті сақтамай жоғары-төмен кетіп, лақтырған кесекше үдере қашты қорқынышты тұстан. Әлгі топ ортадағы қос мергеннің үстіне жеткенде атуға таптырмастай төмен келген болатын. Бірақ... бұл не ғажап – Рысқұл оларға оқ шығармай өткізіп жіберді! Тимур бұған таң қала түсті де, тез ұмытты: не нәрсені болмасын

пайымдап, ой толғап тұратын мұршасы жоқ еді мұның. Енді тіпті қарауытып кеткен аспанда сұлбасы ғана көрініп келе жатқан алдыңғы үйректен жарты құлаш ілгері алып, көздей бастады. Үйректер жақындаған сайын айқындала түсіп, мойындарын ырғайдай етіп көкке шаншып, биіктеп барады. «Тағы да тимес пе екен!» деп ойлауы мұң екен, өзінің ұятқа қалғалы, әсіресе қыз алдында масқара болғалы тұрғаны сап етті есіне. Өзге өзге ғой, осы уақытқа дейін ең құрығанда бір шүрегей алмағаны не оралымсыздық?! Шүріппені үмітсіз басты...

Жарық кезде байқамаған ғажап құбылысты байқады жігіт бұл жолы: мылтықтың ұңғысынан үзіліп, зымырай ұшқан көгіс жолақ топ үйректің дәл астына барғанда қып-қызыл от болып жарылып, бүрк етті. Тұтанған тығын мен түтін толтырып жібергендей болды аспанның астын. Дәрінің мүңкіген иісі алып кетті қолқаны. Түтін сейілген бойда аспанды апыл-ғұпыл шолды да, мылтығын сылқ түсіріп жіберіп, мелшиді де қалды жігіт. «Құс атқан сенің не тенең!» деді. Оқшантайда бір де бір оқ қалмаған болатын. Шырт түкіріп, теріс айналды. Дәл осы сәтте естіді ол Рысқұлдың даусын.

– Тигіздің, Теміржан, тигіздің!.. Апырай, тамаша болғанынын-ай, тигіздің!... – деп қақсап, мәз болып тұр екен қарт. Өзі тіпті тасадаң ашыққа шығып алыпты.

Тимур көкке, енді алыс-жақынды қамтыңқырай, көз салған, – бір үйрек, шынында да, аралға қарай киыс бұрылып, қанатын жидіркелете босаң қағып, төмендеп барады екен. Жүрегі жарыла қуанып кеткен жігіт өз деміне өзі тұншығып «Тиді!» деп сыбырлады да, жылғаны екі аттап кешіп өтіп, үйрек көзден таса болған тұсқа қарай жүгіре жөнелді.

Жаралы құсты таба алмай қыруар уақыт жіберді. Қараңғылық дендеп түсіп, қызылңір таянғанда барыш қолға іліктірді оны. Өзі де титықтап бітті. «Тек табылғай еді! Жалғыз үйрек, бұл бұйырмағанда не бетіммен көрінбекпін елге?!» дей берді. Топпысы сынған үлкен қоңыр үйрек бұта түбінде қыбыр етпестен бұғып жатыр екен. Жігіт өзі де аңдамай аяғымен қағып кетпегенде байқалатын түрі жоқ.

«Несі бар, – деп ойлап келеді енді кері бағыт алған Тимур, – Бекмырза, алымды болғанда, екеуін не үшеуін алсын; шығарған оғына қарағанда, содан артық емес... Қарттардың тындырғаны да мәз болмас: Рысқұлдікі өзіме белгілі, ал Мұхиеддиннің мергендігі, қанша оқ шығарса мейлі, лекер мергендік... Ал менің қолымдағы өзі ескі мылтық, өзі дарауыз. Сондықтан үлкен қоңыр үйрек, жалғыз бола берсін, әнебір қомсынатын олжа емес. Әйтеуір құр қол оралғаннан жақсы ғой...»

Ойын аяқтамастан:

– Мынасы несі?! – деп, қалқиып тұрып қалды жігіт. Бекмырза мен Пірзада жүрген бағыттан басталып еді ғаламат гүрсіл!

Тимур енді байқады: төңіректі түгел тұмшалай, жедел қойылып бара жатқан қараңғылыққа байланысты үйрек біткен өте төмен ұша бастаған екен. Оның үстіне, күнұзын аз сияқты көрінген құстың адам айтқысыз көбейіп кеткені қайран қалдырды жігітті. Сірә, көктің әлі де болса ашық суреті түсіп тұрған су айдынын лекер болса да ажыратып, бәрі соған ұмтылса керек еді. Аздан кейін олар бұрынғыдан да төмендеп, қол созым жерде далбақтап, жақын маңнан үсті-үстіне гүрсілдеген мылтық даусынан қайда кетерін білмей, бастары айналып, шырқобелек ұшып аласұра бастады. (Дәл Бекмырзадай жидіркелетпегенмен, Рысқұл мен Мұхиеддин де құр қалып жатқан жоқ; ал Бекмырзаның асығуы сұмдық болатын!) Жүздеген, мүмкін тіпті, мыңдаған үйрек, қаптап кеткен қалың үйрек! «Мұншама нөпір құс қайдан шықты?!» дей жаздап, жауабын оңай тапты жігіт. «Ө-ә, мана күндіз Бекмырза бұл маңда өзге су жоқ деген екен ғой» деді. Мықтап өкініп бармағын шайнап тұр. Керек болар деп кейінге екі-үш оқ қалдырмағанына кейиді өзіне өзі. Ұпайдан масқара болып ұтылған жері осы-ақ шығар! Жолдастары құсты екі қапталына теңдеп оралғанда, олардан еш кемдігі жоқ бұл жалғыз үйректі, олжам еді деп, енді қалай көрсетеді?! Бәрінен бұрын Пірзаданың алдында жерге кіретін болды-ау! Ұятқа қалмайтын қандай жол бар?»

– Рысқұл да ұзап кеткен бе, неге жер түбінен атып жатыр? – деп дауыстады. – Қой, бұлай тұрып іс бітпес, алыс болса да барып, оқ сұрайын...

Оқыс қозғалып, жөнеле беремін дегенінде шоқалға сүрініп кетті де, келесі сәтте аяғы ойпаңға тап келіп, етпеттей ұшты. Жығылған жерінен тез тұрғанмен, бұрынғы бағытында қайта ұмтылған жоқ, мылтығы мен мана бауыздап алған лекер олжасын аяғының астына тастай салып, тізеден келетін шикі шөпті жапыра, сылқ етіп отыра кетті.

Бекмырза бұрынғысынша екілене гүрсілдетіп, енді Мұхиеддин де онымен жуық маңнан ынтымақтасып, екеуі ортаны қусыра, көлшікке қарай жақындап келе жатыр еді. Рысқұл ғана «хабарсыз» қалған болатын.

* * *

Өмірде кейде әр түрлі оқиға, әр қилы жайлардың ерекше тоқайласып, күтпеген соны нәтижеге соқтырары бар. Бұл жолы да дәл солай болып аяқталды...

Тимур Пірзаданы мұның көгінде қайыптан-тайып жарқ еткен жарық жұлдызға теңеді. Бас-аяғы бір кештің ішінде, бір жайылған дастарқанның үстінде бұрын шығындалмаған жастықтың жалынымен

оны шын, құлай сүйіп қана қойған жоқ, жарқын жүзі мен ашпақ маңдайын оқта-текте болса да көре алмайтын, бүкіл болмыс-бітімін: мінезін, жүріс-тұрысын, сөзін, үнін, әзілін, жанарының оты мен тұнжыр қалпын – қызықтай алмайтын тіршілікті тастай қараңғы түнмен бірдей деді. Ер жігіт үшін әнебір мықтылық емес, әрине, бірақ істер шарасы қайсы, шыны сол. Сөйте тұра, сол жарық жұлдызының көзден таса болар сәті таяу ма деп қалған, және мұнымен күресетін қайрат пен қарсы қояр қадір-қасиетті өз бойынан таппаған. Өмірден түйгені әлі аз болғанмен, әйел адам алдымен еркектің мінезінің ірілігін, көкірегінің кеңдігін, талғам-түйсігінің биіктігін бағалайды деп есептейтін бұл. Жасыратын несі бар, сондай азамат алдарынан шықты, және ол тек кез болып қана қойған жоқ, өзі солай еткісі келсін-келмесін мейлі, Пірзада мен мұның арасына келіп тұрды. Пірзаданың көңілі, Бекмырзаның жасының өзінен көп үлкендігін де, үйлі-баранды екенін де таза мансұқ етіп, оған біржола құлағандай көрініп еді Тимурға. Не таңқалатыны бар: әсіресе әйел адам тарапынан мұндай «көзсіз ерлікті» аз көріп жүр ме екен ел! «Жарайды аралары асқынбасын – Пірзада сезімін ақылға жеңдіріп, Бекмырзаға көңілін ғана беріп, артық сыр ашпасын, бұдан не келіп кетеді! Сөйте тұрып, мені адамға есептемесе, басқасын қойғанда, кейін тіпті бір де бір рет есіне алып жымимаса, бақытсыздық деген сол емес пе?!» деген.

Осының бәрі басқаша аяқталар-ау, Пірзада өзі кешеден бері көрнеу еркелеп, жүрегін ашып «ағалаған», небір сырлы, әсем сұқбатқа барған Бекмырзаға ауыр кінә тағып, онымен қатты сөзге келіп, ренжісіп қалар-ау, сөйтіп ол екеуінің арасы үмітсіз суынып, алысқандар-ау деп бұл, ойламақ түгіл, тіпті армандаса бұйырмасын!...

... Мылтық үні құлақты жарғанды қойып, тыныштық орнаған соң жігіттің есіне енді бәрінің бас құрап, күндіз тоқтаған жерге оралулары керек екені түсті. Жағымсыздау, қатқылдау шыққан кезек сөз осы оймен орнынан тұрғанда шалынды құлағына. Бекмырза мен Пірзада екенін білді. Көп күттірген жоқ, екеуі қарауытып жақын келді. Тимурдың таңқалғаны – әсіресе Пірзаданың үні ашынулы, зілді еді. Даусын ерсі қатты шығарып сөйлеп келе жатқан жоқ, бірақ бейбітшілікті тілемейтін, енді қайтып түсінісуге тырыспайтын сыңайы, тек әйтеуір айтпағын түгел айтып қалуға асығып келе жатқаны айқын аңғарылады.

Өзі күтпеген жаңалыққа Тимур әуелі қуанарын да, күйінерін де білмеді. Оның үстіне, сейілге бірге шыққан жолдастары болса қайтсін, өзгелер арасындағы әңгімеге олардың еріктерінен тыс куә болғысы келмеді:

– Сәтімен оралдыңыздар ма, олжаларыңыз көп пе? – деп дыбыс берді.

Жігіттің сұрағына жауап бермегендерімен, келе жатқандар мұны байқады: жанына келіп тоқтады.

– Қой, Пірзада қарындас, жасым болса үлкен, маған ондай ауыр сөз айтпа, – дейді Бекмырза өкпелі үнмен. Сосын пәлсапа соғып кетті: – Сендер, жастар, көп нәрсені білмейсіңдер, ал шынында, өмір деген – алатыныңды қапы қалмай алып қалудың айла-тәсілі ғана. Сен алмағанмен, оны бәрі бір өзге біреу қағып түседі...

Пірзада айтылған сөзді енді тыңдамай тұрса өзі білсін, екі сапарласының арасында өте ірі келіспеушілік бар екенін сонда ғана аңғарып еді Тимур. Әуелі «Бекмырза, оңаша сәтті пайдаланып қалуды ойлап, бойжеткенге күш көрсетуге тырыспады ма екен?» деген. Пірзаданың мінезінде жәбірленген, қорланған белгінің жоқтығына байланысты ол ойынан бас тартты.

Кенет Пірзада бұған бұрылды да, бірер аттап төніп келді.

– Ә-ә, сіз бе едіңіз? – деді сосын сұп-суық, қатқыл үнмен. Қыздың кешеден бері көрнеу ықылас білдіріп келген адамына деген ренішінің себебі де осыдан кейінгі сөздерінен белгілі болды: – Немене, сіздің де олжаңыз шаш-етектен бе? Сіз де қайда кетерін білмей жан ұшырып, топ-тобымен қол созым жерде далбасалаған сорлылардың жиырмалағанын атып алып, сол «мергендігіңіз» бен «ерлігіңізге» масайрап тұрсыз ба?.. Сөйлеңіз қане, мақтаныңыз, пәлсапа соғыңыз!...

Ақыл-ойы айтылған сөздің байыбына дұрыс бармай жатып-ақ, Тимур қуанып үлгеріп еді.

– Жоқ, Пірзада, маған бұлай деуіңіз – қиянат! – деді жағдайға еш сәйкеспейтін жайдары үнмен. – Себебі менің күнұзаққа алғаным, өлдім-талдым деп атып түсіргенім – жалғыз-ақ үйрек. Оны да мана, ашық-жарықта, алғам... Меніңше, Мұхаң мен Ірекең де сол менің көп алдымда болмаса керек... Немене, құсқа байланысты келіспей қалдыңыздар ма?

Қыз үндеген жоқ. Тек қана Тимурдан бұрынғысынша сырт айнамай, қатар түзеп тұрды. Оның орнына енді бұлардан қашығырақ тұрған Бекмырза сөйледі:

– Мына Пірзада екеуіміз сәттің арасында түсініспей, жанжалдасып қалдық, Тимур інішек, – деді. Кешеден бері көзге ілмей келген бозбаласына енді мұнын шағып, кәдімгідей үміт артып тұрған сыңайы бар. – Болмашы нәрсеге бола... Түсінбеймін..

– Сіз мені ендігі жерде түсінуге тырыспай-ақ қойыңыз, ағай, – деді Пірзада бұрынғыша суық, өр үнмен, оның сөзін бөліп. Әдеттегісінше «аға» демеді, «ағай» деді. – Жалғыз-ақ нәрсеге дауласпаймын: мына Тимур сияқты, мен де сіздің елге қонақпын, сондықтан іштеріңе іріткі салуға тиіс емессің. Бірақ айтатынымды айтып кетемін!.. Бүгін мен аз

ғұмырым ішінде алғаш рет жаңа өзіңіз айтып тұрған «болмашы» нәрсені – адам салған ойранды көрдім. Өкініштісі сол – ол ойранды елге басшы есептелетін сіз салдыңыз. Қолыңызға жабыса жаздап, кешеден бергі бірге туған аға, қарындастай жарастығымызды ортаға салып, жалынғанда да қайрылмадыңыз, араша бермедіңіз. Сондықтан да енді сөз атаулының бәрі артық, сол үшін де мен қазір іштей егіліп жылап тұрмын... Осындай да сейіл, осындай да аңшылық бола ма?! Қораға түскен қасқырдың қылығынан, парықсыз қанқұйлылығынан мұның не айырмасы бар, несі артық?! «Зоотехникпін» демеп пе едіңіз?!.

– Пірзада қарындас! – деді Бекмырза даусы қалтырап, кәдімгідей жалына сөйлеп. – Менен бір білместік болды, кешіруіңізді өтінемін! Райыңыздан қайтыңыз, бармаймын дегенді қойыңыз. Жүріңіз, түскен жерімізге барайық. Сол жерден ризаласып тарасайық... Мен қазір ана азаматтарға да не айтарымды білмей, дағдарып тұрмын. Жүріңіз, өтінемін!

– Жоқ, ағай! – деді Пірзада жібімей. – Құрметіңізге рақмет, бірақ мен енді ол жерге қайтып бара алмаймын. Және кешірімді де сіз менен сұрауға тиіс емессіз, өзіңіз «елім, жерім» деп жүрген мына топырақтан, нудан, судан сұраңыз. Бірақ кешпеуі мүмкін, себебі сіздікі білмегендік емес – жауыздық! Хош болыңыз!

– Пірзада қарындас, тыңдаңызшы!..

– Сіз өзіңізді өзіңіз мұншама жерлеп, төменшіктей бермеңіз, ағай, – деді Пірзада. Кекетіп, мырс етіп күлді. – Несіне сасасыз: елге айтқызып көрсеңіз, сөз жок, олардың көбі сіздің қылығыңызға қылмыс деп емес, әшейін ермек деп қарар еді. Сізді емес, мүмкін, «болмашы» нәрсеге байланысты шу шығарғаным үшін мені кінәлар еді. Сондықтан...

Бекмырза үн-түнсіз қалды. Пірзада тұрғыласына бұрылып, өтініш айтты.

– Ауылға дейін шығарып салуыңызды өтінемін, Тимур! – деді.

... Тастай қараңғыда, өзі үшін дүниеде теңдесі жоқ пенденің қолынан ұстап, кездейсоқ болса несі өкініш, біріне бірі ес, сүйеніш болып өткізген бір жарым – екі сағатты өле-өлгенше ұмытпақ емес Тимур! Тағдыр кейде адамға көктен тастағандай етіп өлшеусіз сыйды ұстата салады деген сенімнің бұл да бір жүзеге асқан көрінісі!

– Мен енді бұл ауылда тыныш жатып демала алмаймын, – деп еді Пірзада сол түні қоштасарда.

Ертеңіне тандағы ұшақпен кетіп қалыпты.



Өлімтік

Сол жолы кеңшардың бас мал дәрігері Отаршин Боранғалиды аға шопан Шөкеменов Бұғыбай киіз үйдің жанында күтіп алып еді.

Шынында, «күтіп алды» деу бұл арада артық айтқандық. Жайраңдап алдынан шығып, қошемет көрсеткен ештеңесі жоқ, тіпті адам біткеннің аузындағы, алғаш жүз көріскен кісіңе дейін айтылататын «жош келдіңізді» де көпсінді. Қара судың бойын өрлей киіз үйге таяп келген мәшинаны табалдырықтан сыртқа аттай бере көрді де, сол жерде табан аудармастан тұрып қалды. Не кері кетпеді, не ілгері жылжымады. Қыр басына қойған қарақшыдан бетер қалқиғаны қалай?

Байқап қарасаңыз, кейде дене бітімі де, қимыл-қозғалысы да ерсі, сүйкімсіз пенделер кездеседі. Ондайлардың жүріс-тұрысы қорбалақтаған оралымсыз, адыр келеді, ал бет мүшелері болса, өзара ынтымақтаспай андағайлап, ақиланып, ереуілдеп тұрады. Бұғыбай да сондай жан еді. «Сырын білмейтін аттың сыртынан жүрме» дейді халық, ал әлгідейлермен сырмінез болу деген – мүмкіндігі мардымсыз тірлік, себебі тұрақты да тиянақты мінез бен дағды жоқ оларда. Осындай жанмен әлдене жайлы сөйлесу, пікірлесу – бұдан өткен қиямет: алатын жауабың қойған сауалыңа зорлап телісең жуықтамайтын айдаладағы бірдеңе болып шығады. Жалшы әлдене турасында келісімге келуге тиіс екі жақ араларында шегіну – ілгері жылжу үшін қажет кішкене кеңістік қалдырып отыруы шарт қой. Әйтпесе сөзде жарастық, шаруада бітім болуы мүмкін бе? Ал әлгі қалыптағылардың әдетте бұл шарттан еш хабары болмайды, олардың ойынша, адамдар арасындағы қым-қиғаш қатынас біткеннің токетері «бар ма – бар», «жоқ па – жоқ», «аласың ба – мә», «бересің бе – әкел» деген сияқты қақшиған қағидалармен шектелуге тиіс. Сөйте тұрғанмен, тек осы қасиеттеріне қарап, әлгілердің бәрін түк есеп білмейтін, өз шаруасына қырсыз пенделер екен деп ойлау асығыстық болар еді. Керісінше, басқалармен салыстырғанда, дәл осындайлардың ішінде жеке басының пайдасына келгенде алдына жан салмайтын ұңғыт, бір ұстаған пұшпағынан енді өлсе айрылмайтын дүниеқор, сонысына қоса кикарлығымен көліктің терте ағашын сындыратын тоңмойындар көбірек ұшырасады...

Жұмыс көлігін Боранғалидың өзі жүргізетін. Онысын үй сыртына тоқтатып, қойшының жанына келді.